

BISTA ATRAS RIBA CARNAVAL 98 (Fin)

Pa: Juby Naar

RUTANAN

Di e rutanan di Carnaval, no tin mucho di menciona. Ruta di mucha na San Nicolas pa hopi aña no tin problema, ni e ruta di parada grandi, cu ta e ruta mas pisa di carnaval, pero esun tambe cu ta mas gusta.

Na playa e aña aki, e ruta di parada di mucha no a resulta, y pa otro aña lo mester tuma medida encuan to e ruta mirando cu carnaval lo ta hopi mas grandi.

E ruta di parada grandi tambe, lo mester wordo disbuti for di awor y busca alternativenan for di awor, si mester cambia esaki.

Ta bon pa SAC y Cuerpo Policial sinta na mes cu lidernan di grupo y laga e lidernan comenta di nan experiencia di e ruta aki.

Medida mester wordo tuma sigur pa locual ta e pida di Sonesta hotel pa DOW. Pa hopi grupo Carnaval mas bien a caba aki pa nan, debi na e molester cu nan a pasa aden.

SERLIMAR/DOW

Esnan cu tambe mester di un bon aplauso ta e trahadonan di DOW y Serlimar, encarga cu e ponemento y kitamento di baricadanan y encarga cu limpieza di e ruta despues di parada. E shonnan aki realmente ta traha duro despues di parada.

E keho ta solamente cu no mester cuminsa kita e baricadanan mes ora cu e parada pasa. Warda por lo menos 15 minuut, pasobra e kitamento den e forma cu e ta tumando lugar ta trece peligro cune net na momento cu e publico ta movilisando di un lugar pa otro debi na e "Bull Jam" di "Last Lap" cu a caba di pasa.

E aña aki e publico a comporta su mes mihor cu aña pasa pa locual ta limpieza, sinembargo lo ta mihor pa e equipo di Serlimar pasa poco mas laat pa e hacimento limpi, pasobra no mucho despues cu nan a pasa, ainda tin hende ta deposita sako cu sushi pa wordo busca, y otronan ta cana tira sushi rond caminda ya a wordo haci.

SAC SAC Y SAC

Na varios ocasion durante e relato di e dianan aki, "Bista atras riba carnaval 98" mi a menciona e falta di bon organizacion y planificacion, cual naturalmente ta cay riba SAC pa e diferente actividadnan.

Sinembargo, mi mester menciona cu e aña aki a pesar di tur e problemanan di cambio di actividad, cambio di fecha, anulacion di actividad, mi a mira un SAC cu mihor trabao cu ultimo añanan.

Den circulo di e "damanan" mi a ripara si cu tin friccionnan y e aña aki mas cu nunca.

SAC a demostra e aña aki cu nan lo por percura pa un bon carnaval, y si bon organizacion y planificacion haci su entrada, Aruba lo por goza na 1999 di un carnaval superior y su problema di fecha y cambio nan.

TRIBUNANAN

E aña aki e tribunanan di META corporation dilanti oficinanan di gobierno y di Los Laga Bay a demostra e necesidad di mas di esakinan durante paradan. Pa carnaval 1999 ta ser spera cu lo tin mas tribuna canto di e ruta pa asina mas hende haya oportunidad di sinta y mira nan parada.

Pa e VIP Stands di Los Laga bay tambe mester bay un pabien. Bunita ta cu nan a pone nan tribunanan disponibel pa nos grandinan, pa patientnan di Paaz, y pa Cruz Corra.

Cruz Corra cu a mula e aña aki atrobe y cu voluntarionan cu a kere despues di parada cu nan por a bay descans y come y haya nan mes na Scopapelstraat pa un desgracia di trafico y despues na Pacifico pa un hincamento y tur e momento ey cu pianan yen di blaar y cu casi nan no por a cana.

Cruz Corra MESTER di un Ambulance mas y ta na nos pa yuda e organizacion voluntario aki logra su meta e aña aki.

PA OTRO AÑA ?

Cuminsa traha di awor.



Gruponan cuminsa move di awor, tene boso actividadnan di recauda fondo di awor, percura pa registra miembronan di awor (corda cobra na tempo tambe).

Pa SAC, no tene vacacion. Cuminsa traha entrante otro siman mes riba carnaval 45 pasobra esaki lo ta grandi y pa nos turismo mester cuminsa cu promocionnan rond mundo di awor caba. Reuni, planea, organiza, y evita asina e criticanan di tur aña riba actividadnan. Cuminsa cu un pa un di e actividadnan y drecha loke mester drecha.

SAC pabien cu un bunita carnaval, pueblo di Aruba

pabien cu e carnaval exitoso tras di lomba y laga nos cuminsa traha di awor pa esun

di otro aña cu bista tambe riba 2000.